

Ccase manda'cho

Deuteronomio

Cincoyi tsu Na'su in'jaensi Moisés tevaen'cho. Quinta tsu Ccase manda'cho tevaen'jen. Ccase condaquia'caen tsu israendecchu a'i menia can'jen'choma condapa majan toya condambi'choa Chiga mandasi tsoña'choma'qqe conda. Toya'caen Moisés osefa'poe candusiamba pa'chone conda.

Moisés israendecunga conda'cho

1 ¹Qquen tsu Moisésja poi israendecunga conda toya Arabáni can'jen'fasi. Nane Arabá a'i menia tsu Jordán Na'ema chiga sombo'jefani.

Afe'cho andeni ja'faye manda'cho

2 ¹⁶Poiyi'cco tsesu Chiga se'pisi afeya'cho andenga ca'niña'bi'choa israe'su sundarondeccu pa'fasi ¹⁷tsu Na'su Chigaja qqen ñama su: ¹⁸“Ja'ño a'ta Moab andema pashamba Ar canquengae jayipa ¹⁹amonitandecsuma cachui'ta tise'pama noñangian'fajama ni tise'pai'ccu iyicco'fajama. Nane tsendeccu'qqe tsu Lot omba'su aindeccu. Nane que'inga gi afeya'bi gi tsa'su andema, tayo tise'panga afe'chosi.”

²⁴Tsomba tsu Na'su Chigaja su: “¡Jangipa fae'ngatsse japa Arnón Na'ema ise'faja! Ña gi tsoña cuintu que'ija amorreo'su Hesbón na'su Sehónma patsupa tise andema itsa'faye. ¡Que'i can'jeña'cho andenga ca'nimba geraen'faja! ²⁵Ja'ño a'ta tsu poiyi'cco tsa ande'su aindeccu que'ima ñoame dyojoye ashaen'faya. Nane que'ine jongoesuma paña'da tsu ttun'dundu'je'e dyojo'faya. Toya'caen que'ine asi'ttaen'da tsu ñotsse in'jambitsse da'faya.”

Israendecchu Sehónma patsu'cho

²⁶Toya Cademot a'i menia can'jemba gi condasundecsuma manda moe Hesbón na'su Sehónma. In'jan gi cuintu tise ma iyicca'ya'be'yi in'jan'faye tise andema pashaña'chove. Tsa'caen in'jamba gi condasundecsuma manda cuintu qqen su'faye: ²⁷“In'jan'fa gi que andema pashañe. Nane

ni tansinfanga ni pavefanga attufambe'yi gi tansintsse rande tsaiqui'ye ja'faya. ²⁸⁻²⁹Toya'caen jongoesu añ'a'choma an'da, tsa'ccuma cu'ita gi quenga afepoña totoacorima. Nane Seir ande'su Esaú omba'su aindeccu toya'caen Ar canqque'su moabitandeccu tisupa andema pashañe anttequua'caen gi quema ñajan cuintu que andema'qqe pashañe antteye Jordán Na'ema iseya'ngae. Tsama isepa gi Na'su ingi Chiga inginga afeya'cho andenga ca'ni'faya.”

³⁰Tsa'caen ñajansi tsu na'su Sehónjan se'pi ingi tise andengae pashañe. Nane Na'su que'i Chiga tsu tisema in'jaen cuintu tsa'caen ñoa'me se'pisi que'ija tisema geraemba patsu'faye. (Nane tsa'caen tsu Na'su Chigaja tayo tson.)

³¹Tsonsi Na'su Chigaja ñama su: “Ja'ño gi ashaen na'su Sehón, pa'cco tise andema'qqe quenga afeye. Japa tise andenga ca'nimba pa'ccoma patsupa itsa'faja.”

³²Tsonsi Sehónjan poi'yi'cco tise sundarondeccui'ccu sombo Jahazani ingi'ccu geraeñe. ³³Tsa'ma Na'su ingi Chiga ingima fuitesi gi tise, tise dutssiyendeccu, tise sundarondeccuma'qqe metsse patsu'fa.

³⁴Toya'caen gi pa'cco tise canquema asi'tta da'ñomba poi tsandie, pushesu, dushundeccuma'qqe fitti'tti sefaen'fa. Nane ni fae'ccoveyi'qqe antte'fambi gi cuintu canseye. ³⁵Tsa'ma oveja toya'caen vaurama'qqe canseye isupa an'bian'fa. Toya'caen osha'cho canqueni ti'tsse bare'cho jinchoma'qqe isupa an'bian'fa. ³⁶Arnón Na'en jin'tti'su Aroer canquene toya'caen fattocco enttinge'su canquene ashaemba gi poi canquema patsu'fa Galaad canquepi. Nane Na'su ingi Chiga anttesi tsu poi'yi'cco oshambi'tsse dapa patsuye'fa. ³⁷Tsa'ma Na'su ingi Chiga mandaquua'caen gi amonitandeccu andemajan itsa'fambi. Toya'caen Jaboc na'en jin'tti'su ande, ccotta'cco'su canqque, faesu andema'qqe Na'su ingi Chiga se'pi'chosi gi patsu'fambi.

Moisésma se'pi Canaánni ca'niñe

3 ²³Toya'caen gi Na'suma qquen ñajan: ²⁴“Na'su, ña gi quema shondo'su. Queja osha'choma osha'chopa osha'choma ti'tsse joccapitssiapa tsama ñanga canjeñe ashaen. Nane va andeni ni sefacconi can'jembi tsu faesu Chiga quia'caen tsomba osha'cho ti'tsse'tssia've tson'su. ²⁵Chigáne, antteja ñajan va Jordán na'ema isepa tsa ñotssia andema atteye. In'jan gi tsa ande'su ccotta'ccoma attepa Líbanoma'qqe atteye.” ²⁶Tsa'ma tsa'caen ñajansi Na'suja ñama iyicca'yepa se'pi que'i shacaen'chone. Se'pipa ñama qquen su: “¡Ziyaja! Ccase tsane ñajanjama. ²⁷Pisga ccotta'cconga ansunde ccutsupa poifa'su andema canjan. Tsa'ma Jordán na'emajan iseya'bi qui. ²⁸Josuénga condaja tise ma'caen tsoña'chove. Toya'caen tisema in'jaemba quiñaejan. Nane tise tsu israendeccuma angacamba mandaya cuintu tsa que atte'cho andema patsupa an'bian'faye.”

Ti'tsse'tssia manda'cho

6 ¹Qquen tsu Na'su que'i Chigaja tise manda'choma afapa manda ña que'inga atesiañe cuintsu que'i an'biaña'cho andeni can'jemba tsama pañamba tsa'caen tson'faye. ²Tsa'caen tson'jemba qui que'i dushundecui'ccu Chiga que'i Na'suma ñotsse tson'faya. Poi a'ta, poi canqque'fa tsa'caen canse'fasi tsu Na'suja antteya que'i tsain'bitssi canqque'fave canse'faye. ³Tsa'cansi, israendeccu, Chiga manda'choma pañamba tson'faja. Nane tsa'caen tsomba qui tsa andeni ñotsse cansepa ti'tsse'tssi aindecuve atapa'faya. Na'su que'i tayopisundecumbe Chiga tise'pama tansintsse suqquia'caen tsa andeni tsu chocho toya'caen tuño cuñajun'cho'qqe shacaya'bi.

⁴Israendeccu paña'faja: Na'su, ingi Chiga, tsayi tsu Na'suja.

⁵Pa'cco injama'choi'ccu Na'su que Chigama ñotsse in'jan'faja. Nane pa'cco que canse'pai'ccu, pa'cco que quin'sui'ccu tise ma ñotsse in'jan'faja.

⁶Ña ja'ño a'ta Chiga manda'choma que'inga atesian'choma injama'chonga ñotsse in'jan'faja. ⁷Anttembe'yi que'i dushundecunga'qqe tsama condase'faja. Tisu tsaoni dyai'a'qqe tsambi'ta tsaiqui'ye jayi'a'qqe tsane condase'faja. Nane anañe ccui'a'qqe, toya'caen sinte qquendyapa jangi'a'qqe tsane condase'faja. ⁸Que'i tive tandan'fanga toya'caen otifaccunga'qqe ña manda'choma tevaen'faja. ⁹Toya'caen que'i tsa'o sombo'ttinga tsa'o dyaiña'chonga'qqe tsama tevaemba ancaen'faja.

Moisés Chigama paña'faye su'cho

¹⁰Na'su Chigaja que'i tayopisundeccu'yenga, nane Abraham, Isaac toya'caen Jacobnga'qqe, andema jai'ngae afeya'chone tansintsse conda. Ja'ño tsu Na'suja que'ima tsa andenga ca'niaña. Ñotssia rande canqque tsu tsa andeni jin, que'i canquiami'choa. ¹¹Canqque'su tsaoni tsu osha'cho ñotssia jincho, que'i chavambi'choa. Tsa'ccu poso'qqe tsu jin, que'i changoemi'choa. Toya'caen tsu o'fa tsajaccu, olivoccu'qqe jin, que'i jombi'choa. Tsa'ma tsesuma ttepputsse amba ¹²aqqe'pa'fajama Na'su que'ima Egipto'su semajen'cho'ye somboen'suma. ¹³Na'su que'i Chigama ñotsse in'jamba tise'veyi shondo'faja. Que'i su'cho tansintssia qquen canjaeñe in'jamba tise inisei'ccuyi afa'faja. ¹⁴Pporotsse canjen'su israembindequiambe chigandecuma in'ajan'fajama. ¹⁵Nane tsa'suma in'ajan'ninda tsu Na'su que'i Chigaja, cca'isu chigandecuma chi'gapa, iyicca'yepa que'ima tsangae nepiaña.

¹⁶Queñacan qquen tson'fajama Na'su que'i Chigama Masahni can'jemba tson'faquia'caen. ¹⁷Tsa'ma Na'su que'i Chiga su'choma tise manda'choma'qqe ñotsse pañamba pa'tssima tson'faja. ¹⁸Tsa'caen tson'ninda tsu Na'suja cambia avujatssipa tsa que'i tayopisundeccu'yenga jai'ngae afeya'cho qquen su'cho ñotssia andema que'inga afesi qui ca'nimba opatsse cansepa an'bian'faya. ¹⁹Toya'caen tsu Na'suja tise suqquia'caen poi'yi'cco que'i enemigondecuma tteya mañaña.

Faesu chigama ñajan'fajama

7 ¹Na'su, que'i Chigaja, que'i an'biaña'cho andenga ca'niamba siete ande'su aindecuma, que'ima ti'tsse quin'an, ti'tsse tsain'bitssia aindecuma tteya mañaña. Nane hititandeccu, gergeseondeccu, amorreondeccu, cananeondeccu, ferezeondeccu, heveondeccu, jebuseondeccuma'qque tsu tteya mañaña. ²Na'su que'i Chiga anttesi que'ija tsendecuma patsupa tise'pama metsse nepiaña'cho. Nane tise'pama mendeye'fajama ni injancco'fa'chove tise'pai'ccu afa'fajama. ³Toya'caen tise'pa'suma casara'fajama. Que'i dutssiyendecuma tise'pa onquengendecunga antte'fajama ni que'i onquengendecuma tise'pa dutssiyendecunga antte'fajama. ⁴Nane tsa'caen tson'ninda tsu tsendeccu que'i dushundecuma qqueña'faya cuintu Na'su Chigama catipa faesu chigandecuma ñajan'faye. Tsa'caen tson'fa'ninda tsu Na'suja que'ima iyicca'yepa tse'faei'ccuyi nepiaña. ⁵Qquen tsu que'i tsoña'cho: tise'pa chiganga afe'je'cho oque oraen'jen'choma tsu osuiaña'cho. Toya'caen tsu tise'pa ñajan'jen'cho patu, quini'ccoma'qque ucca'sho catiya'cho. Toya'caen tise'pa ñoña'cho chigandecuma'qque oqueya'cho. ⁶Nane que'ija Na'su que'i Chiga in'jan'cho aindecu qui. Na'suja poi ande'su aindecu'su'ye que'ima in'jamba attufaen tsumbeve.

Israendecuma in'jamba isu'cho

⁷Na'su Chiga ti'tsse injan'on aindecuma tta'ttambipa que'i injan'ombi'ma atepa tsumbeve isu. Nane que'ija ñoa'me faesu aindecuma bove'cco qui. ⁸Tsa'ma Na'suja que'ima Egiptoni'su sema'jen'cho'ye somboen. Nane tise ñotssia quin'sui'ccu Egipto'su na'su faraónma patsupa que'ima in'jamba ccushaen tise que'i tayopisundeccu'yenga tansintsse su'choma tsoñe.

A'ija panmeñi amba canse'faya'bi

8 ¹Ña ja'ño que'inga condase'cho manda'choma pañamba tson'faja cuintu injan'on a'ive atapapa va andema patsufaye, va Na'su que'i tayopisundeccu'yenga afeye qquen su'cho andema. ²Ñotsse injan'jen'faja Na'su, que'i Chiga, cuarenta canque'fave que'ima a'i menia angacan'choma. Nane atesucañe in'jamba que'ima vanaemba opatssia've tson que'i injama'choma atesuye. Ñoa'me tsu atesuye in'jan que'i tise manda'choma paña'chove tsambi'ta pañambi'choa've. ³Tsa'caen in'jamba tise'pama qquipoe'sian vanae'an'qque tsu omboe manáma o'fian. Nane que'i ni que'i tayopisundeccu'ye tsa manáma atesu'fambisi Na'su Chigaja tsama o'fian cuintu que'i qquen in'jamba canse'faye: jo'su panmeñi amba canse'faya'bipa Chiga Aya'fa'qque in'jaensi tsu a'ija ñoa'me canse'faya. ⁴Tise'pa tsa'caen cuarenta canque'fave a'i menia jacan'fa'ni'qque tise'pa ondiccu'je'cho sarupa tssoruve dambi ni tise'pa tsu'tte'qque ppu'fambi. ⁵Nane yaya tise du'shuma nafattianquia'caen tsu Chigaja que'ima nafattian.

⁶Tsa'cansi Na'su, que'i Chiga, manda'choma pañamba tise ma in'jamba ñotsse afapa tise nafattianquia'caen canse'faja.

Chiga israendecuma fuite'je'cho

9 ¹“¡Israendeccu, ñama paña'faja! Tayo tsu Jordánma iseya'cho nepi. Isepa qui que'ima ti'tsse quin'anma, ti'tsse injan'on aindecuma patsuye ashaen'faya. Tise'pa rande canquema'qqe sefa'tssia ttuccui'ccu ttu'cho canquema qui osuiamba patsuf'faya. ²Tsa canqueni can'jensundeccu tsu tayopi'su Anac dutssiyendequia'caen dyo'jinma bia'a aindecu. Nane Anacja dyo'jin'onsi tsu a'ija su'fa, 'Majañi'qqe tsu Anac dutssiyendeccu'ccuja iyicco'faya'bi.’

³“Tsa'ma ñotsse in'jan'faja: Na'su que'i Chiga tsu si'nge anchandaquia'caen que'ima o'tie jayipa tsa aindecuma patsupa nepiaña. Nane Na'su suquia'caen qui junde tsa aindecuma joquitssiamba nepian'faya. ⁴Na'su que'i Chiga tsa'caen que'i'ccu va faesu canque'su aindecuma joquitssiansi tisu injama'choni qquen su'fajama: 'Ingija ñotssisi tsu Na'su Chigaja ingima fuite va andema patsuye.’ Nane tsa ande'su aindecu egae tsinconsi tsu Na'su Chigaja tise'pama patsupa joquitssian.”

Chiga Aya'fama afa'su jiya'cho

18 ¹⁷Tsonsi Na'su Chigaja ñama su: “Aindecu ña aya'fama afa'suma pañañe in'jan'choja ñotssi tsu. ¹⁸Nane quema'caen gi faesu ña aya'fama afa'suve israendeccu'suma ccutsiaña. Ña tisenga jongoesuma condasesi tsu tsa ña mandapa su'choma aindecunga condaya. ¹⁹Na Aya'fama afa'su ña mandapa afa'choma condasesi poiyo'cco majan tsama pañambian'da gi tsambe shacama canjaeña. ²⁰Tsa'ma faesu 'Chiga Aya'fama afa'su gi' qquen supa ña afambi'choama condasepa 'Chiga Aya'fa tsu' qquen su'ninda tsu tise ma fi'ttiya'cho. Toya'caen majan faesu chiga afa'choma afa'ninda tsu tsama'qqe fi'ttiya'cho.”

Andema agatto'choma itsa'masia

19 ¹⁴Na'su que'i Chiga que'inga afesi can'jeña'cho andema attufaemba agattopa majambeve canjaeñe tayo ccutsian'cho patuma joquitssian'fajama faenga'sumbe andema itsaye.

Afopa'choe cambia afasundeccu

¹⁵Fae cambia afa'suja barembi a'i egae tsinconsi tise egae tsincon'choma condaye. Tsa'ma dos, tsambi'ta tres cambia afasundeccu fae'ngatsse afapa tsu tise egae tsincon'choma conda'faya.

¹⁶Tsa'ma majan afopa'choe cambia afa'su faesuma afasepa egae tsincon qquen afopoen'da ¹⁷tsu tise, tisenga afaseye'su'qqe Na'su Chiganga ccutsu'faya'cho. Nane tsequi a'ta manda'su Chigama afasundeccu, ñoquiansundecunga'qqe ccutsu'faya'cho. ¹⁸Tsa'caen ccutsu'fasi tsu ñoquiansundeccuja pa'cco tson'choma

pañambe in'jan'faya ma'caen tson'jen'chove. Ñotsse tta'ttapa tsa cambia afa'su faesuma afasepa aquia afopoen qquen in'jan'da ¹⁹tsama injama'choma somboña'cho. Nane tsaja faesuma vanañe in'janquia'caen tsu tisu vanaña'chove antteye. Tsa'caen tsu tsoña'cho que'i aindeccu'su egae tsincon'choma joquitssiañe. ²⁰Nane cca'indeccu tsane pañamba dyopa tsa'caen afopoña'bi faesuma dañe. ²¹¡Egae tsinconsundeccuma mende'yejama! Nane fi'tti'suma fi'ttija. Tso'fema daño'sumbe tso'fema somboenjan. Tte'ttoma ucca'sumbe tte'ttoma u'ccaja. Tivema daño'sumbe tivema dañojan. Tsu'ttema daño'sumbe tsu'ttema dañojan.

Faesu manda'cho

21 ²²A'i ñoa'me egae tsinconsi fi'ttipa quini'conga anga dusiañe manda'a'qqe ²³antte'fajama pa'chombe ai'vo tsequi cose tsani duseye. Nane tsequi a'tayi tsu a'tuya'cho, Na'su, que'i Chiga, que'inga afepa an'biaña'cho andema dañosa'ne. Nane poi'cco majan quini'conci duse'fa'choja, Chiga iyicca'yese tsangae catiye'cho tsu.

Tsandie pushesui'ccu egae tson'cho

22 ²²Tsandie faesumbe pushei'ccu ccuisi atte'ta tsu poi'ccoma indipa fi'ttiya'cho. Nane tsa'caen tsu tsoña'cho cuintsu tsesu egae tsincon'cho israendeccu'ye pasaye.

²³Tayo inajañe'cho pushesu toya tise tsa'ndui'ccu can'jembi'choama, faesu tsandie canqueni tise ma'atpepa fae'ngae can'jensi atte'ta ²⁴tsu poi'ccoma indipa canque'su nasundeccunga angapa ccutsiaña'cho. Tsonsi tsu nasundeccu tise'pama patui'ccu fi'ttiya'chove manda'faya. Nane pushesu canqueni can'jemba faesunga indiyepa faesu a'i tise ma'ccushaene fundombi'choa'ne tsu fi'ttiya'cho. Toya'caen tsandie tise faenga'su pusheya'choma daño'chone tsu fi'ttiya'cho. Nane tsa'caen tsu tsoña'cho cuintsu tsesu egae tsincon'cho que'i aindeccu'ye pasaye.

Pushema catiya'chone manda'cho

24 ¹Tsandie pushesuma pushepa omboe tise ma'caen jinchosi chi'gapa catiye in'jan'da tsu catiya'cho tevaen'jema tevaemba afepa tisu tsa'o'ye joquitssiaña'cho. ²Pushesu'qqe tsa'o'ye sombopa faesuma tsa'nduye osha. ³Tsa'ma ccase tsa'ndusi tsa tsandie'qqe tise ma'chi'gapa catiya'cho tevaen'jema tevaemba afepa tise tsa'o'ye joquitssian'ninda (tsambi'ta tise pa'ninda) ⁴o'tien'su tsa'nduja tise ma'tayo catipa ccase pusheye oshambi Na'su Chigama iyicca'yansa'ne. Nane pushesu faesu tsandiei'ccu can'jemba tayo dañongequia'caen ega. Tsa'caen tsomba Na'su que'i Chiga que'inga afepa an'biaña'cho andema daño'fajama.

Faesu manda'cho

25 ⁴Vaura trigoma tsu'ttei'ccu tsu'tsu qqesho'je'ninda tsambe aya'fama tandanjama aña se'pipa.

Tsa'ndu pasi antiandeccu tsoña'cho

⁵Dos antian fae tsaoni can'jemba fae'cco du'shu me'choyi pasi pa'chombe pusheja faesu'suma tsa'nduye oshambi. Pa'chombe antiañi tsu tisema pusheya'cho cuñado tsoña'choma tsoñe. ⁶Tsa'caen tsonsi aisheve isu'cho du'shuma tsu pa'chombe du'shu qquen suya'cho pa'chombe inise Israel aindecu'suma aqqe'pasa'ne.

Nane tsa'caen tsu Moisésja israendecunga condase.

Ccotta'cconga ccutsusi manda'cho

27 ¹Moisés, Israel coenzandeccu'qqe israendecuma qquen manda'fa: “Pa'cco ingi ja'ño a'ta manda'choma ñotsse pañamba tson'faja. ²⁶Majan va manda'choma chi'gapa tsa'caen tsombi'ninda tsu Chigaja iyicca'yepa tsangae qqeñaña.”

Tsonsi poiyl'cco israendeccu tsama pañamba su'fa: “Ju, tsa'can tsu.”

Pañambi'ta vanaña'cho

28 Toya'caen Moisés levítandeccu'ccu aindecunga qquen su'fa: ⁵⁸“Osha'cho va tevaen'jeni tevaemba manda'choma ñotsse pañamba tson'faja. Toya'caen Na'su que'i Chiga joccapitssia inisema dyoe'sui'ccu ñotsse in'jan'faja. ⁵⁹Tsa'caen tsombi'ninda tsu Na'su Chigaja osha'cho ega paqqe'suma que'inga, que'i dushundecunga'qqe moeña. Nane ccusha'masia paqqe'suma moesi qui bo'tsse vana'jen'faya. ⁶⁰Nane egiptondecunga egae daqqe'suma, tsa que'i dyoqqe'suma, moesi qui tsangae vana'jen'faya. ⁶¹Toya'caen tsu faesu paqqe'su, faesu egae daqqe'suma'qqe, va tevaen'jeni condambi'choama que'inga moeña que'ima metsse sefaeñe. ⁶²Tsa'caen tsonsi, que'i, israendecuja, tayoe sefacco'su o'fema agattoye oshambi'tssiqqia'caen qui tsequi a'ta Na'su que'i Chigama ñotsse pañambipa re'ricco a'ive da'faya. ⁶³Na'suja que'ima ñotsse tsomba atapoemba avujatssiqqia'caen tsu que'ima dañomba nepian'an'qqe avujatssiya. Nane jon'choma sai isuqqia'caen tsu que'ima que'i can'jeña'cho ande'ye quian'me joqqitssiaña. ⁶⁴Joqqitssiamba tsu Na'suja que'ima shequian mañaña poi faesu andenga, sefacco já ccutsuni. Tseni can'jemba qui faesu chigandecuma iñajan'faya. Nane que'i ni que'i tayopisundeccu'ye atesumbi'choa quini'cco toya'caen patuma ñoña'cho chigandecuma qui iñajan'faya.”

Chiga ccase in'jañe tsoña'cho

30 Toya'caen Moisés poi israendecuma ttu'sepa qquen su: ¹“Ñajan que'inga conda osha'cho ñotssia toya'caen osha'cho egae da'choma cuintsu que'i majame in'jan'da tsama tson'faye. Na'su que'i Chiga faesu andeni que'ima shequian mañasi can'jen'da qui tsane asi'ttaen'faya. ²Asi'ttaemba Na'suma

ccase in'jamba que'li, que'li dutssiyendeccu'qque pa'cco injama'choi'ccu pa'cco canse'pai'ccu tisema pañamba ña ja'ño mandaquia'caen tson'jen'fa'ninda ³tsu Na'su que'li Chiga que'ima mende'yepa ñotssiama ccase que'inga afeya. Poi andeni tise que'ima shequian maña'cho ande'ye tsu que'ima ttu'sepa boñaña. ⁴Nane que'li aindeccu ñoa'me ti'tsse biani'su andeni can'jen'fa'ni'qque tsu Na'su que'li Chigaja tsendeccuma'qque tta'ttapa iya. ⁵Que'li tayopisundeccu'ye can'jen'cho andeni isi qui ccase tseni can'jen'faya. Ccase tseni can'jensi tsu Na'suja que'ima ñotsse tsomba que'li tayopisundeccu'yema ti'tsse'tsse atapoña. ⁶Tise que'li'ccu injancco'fa'choma tsu que'li injama'chonga tevaemba que'li dutssiyendeccu injama'chonga'qque tevaña cuintsu pa'cco injama'cho, pa'cco canse'pai'ccu tisema in'jan'faye. Tsa'caen in'jamba tsu ñotsse canse'faya. ⁷Toya'caen Na'su que'li Chiga tsu osha'cho egae daque'suve que'li enemigondeccunga tsoña, que'ima chi'gapa noñangiansundecunga'qque. ⁸Tsa'ma que'ija toequi Na'sunga jipa qui pa'cco ña ja'ño manda'choma pañamba tson'faya. ⁹Que'li tsa'caen tsonsi Na'suja antteya que'li osha'cho tsoña'choma ñotssiave naniñe. Tsain'bio du'shuve atapapa tsain'bio aiña'chove'qque qui atapoen'faya. Toya'caen que'li jomba'cho'qque ñotsse sho'yosi qui injantsse tai'je'faya. Na'su que'li Chiga que'li tayopisundeccu'yenga ñotsse tsomba avujatssiquia'caen tsu ccase que'inga ñotsse tsomba avujatssiya. ¹⁰Nane Na'su que'li Chigama ñotsse pañamba va tise tevaen'cho manda'choma'qque pañamba tson'ninda tsu tiseja avujatssiya. Toya'caen pa'cco que'li injama'choi'ccu, pa'cco canse'pai'ccu toequi Na'sunga jipa in'jan'ninda tsu tiseja avujatssiya.

¹¹“Ña ja'ño a'ta que'inga conda'cho manda'choja panshaen aiye'pambi tsu ni osha'masiambi tsu. ¹²Nane sefacconiñi manda'chombi tsu cuintsu que'li suye: ‘¿Majan tsu ingine sefacconi japa pañamba jipa condasesi gi pañamba tsa'caen tson'faya?’ ¹³Ni mar jonifaniñi manda'chombi tsu cuintsu que'li suye: ‘¿Majan tsu ingine marma isepa pañamba jipa condasesi gi pañamba tsa'caen tson'faya?’ ¹⁴Tsa'ma va manda'cho que'li'ccu pporotssisi qui tayo pañamba tsane asi'ttaemba in'jan'fa. Nane tayo pañamba qui tsa'caen tsoñe osha'faya.

¹⁵“Que canjan, ja'ño a'ta gi canseya'chove ñotssiama isuya'chone que'inga condapa toya'caen paya'chove egama isuya'chone'qque conda que'li majame in'jan'da tsama isul'faye. ¹⁶Nane ña ja'ño que'inga conda'choma pañamba Na'su que'li Chigama ñotsse in'jamba tisei'ccu jacanquia'caen omboemba tise manda'choma tise su'choma'qque pañamba tson'da qui bo'tsse cansepa tsain'bio du'shuve atapa'faya. Toya'caen tsu Na'su que'li Chiga que'ima ñotsse tsoña que'li can'jeña'cho andeni can'jensi. ¹⁷Tsa'ma osha'choma chi'gapa pañambipa ccaningae daquia'caen faesu chigandecunga ccarupa in'jan'da ¹⁸qui ñoa'me pa'faya. Nane ja'ño gi que'ima su, tsa'caen tson'da bo'tsse can'jen'faya'bi qui que'li Jordán na'en jonifani isepa patsuya'cho andeni. ¹⁹Sefacco, ande jin'ni gi ja'ño ñoa'metsse que'inga conda cuintsu que'li majame in'jan'da tsama isul'faye: canseya'cho tsambi'ta paya'choma isuye, toya'caen Na'su inginga ñotsse tsoñe tsambi'ta ingima egae tsoñe. Tsa'cansi canseya'choma isul'faja que'li, que'li dushundeccu'qque

cansel'faye. ²⁰Na'su que'i Chigama ñotsse in'jan'faja. Tisema ñotsse pañamba tise suqquia'caen tson'faja. Nane tise tsu que'ima cansian'su. Que'ima cansiansi qui bo'tsse canquue'fave can'jen'faya, que'i tayopisundeccu'yenga afeye su'cho andeni. Nane que'i tayopisundeccu'yenga Abraham, Isaac toya'caen Jacobnga'qqe tsu Na'su Chigaja, ñoa'me su'choi'ccu tsa'caen su."

Moisés Josuénga manda'cho

31 ¹Ccase Moisés israendecuma condapa qqen su: ²"Tayo ciento veinte canquue'fave an'biamba gi ti'tsse que'ima angacañe oshambi. Toya'caen Na'suja ñama se'pi Jordán Na'ema iseye. ³Tsa'ma Na'su que'i Chiga tsu que'ima o'tie jayipa tsa ande'su aindecuma patsupa nepiaña que'i tseni can'jen'faye. Na'su suqquia'caen Josué tsu que'ima mandapa angacaña. ⁴Nane Na'suja amorreo nasundeccu, Sehón toya'caen Ogma fi'ttipa tise'pa andema'qqe patsupa nepianqquia'caen tsu tsa ande'su aindecuma'qqe nepiaña. ⁵Na'su tsa'caen anttesi que'i tsa andesundeccuma patsu'ta ña que'inga mandaqquia'caen tise'pama tson'faya'cho. ⁶Que'i injama'choma ñoñamba quinse'tsse iyicco'faja. Dyombe'yi tise'pai'ccu geraen'faja. Nane Na'su que'i Chiga tsu que'ima catimbe'yi que'i'ccu fae'ngae iyiccoya."

⁷Tsomba tse'i Moisésja Josuéma ttu'sepa, poiyl'cco israendeccu paña'jen'ni, tisenga qqen su:

"Que injama'choma ñoñamba quinse'tsse tsonjan. Nane que qui va aindecuma angacaña Na'su Chiga tise'pa tayopisundeccu'yenga tansintsse su'choi'ccu afeye qqen su'cho andeni. Queja tise'pama mandasi tsu tsa andema patsupa an'bian'faya. ⁸Na'su que Chigaja quema o'tie japa que'i'ccu can'jeña. Tiseja quema catiya'bi ni chi'gaya'bi. Tsa'cansi dyojama ni injansejama."

Manda'cho tevaen'jema an'bian'cho

²⁴Tsomba Moisés pa'cco manda'choma tevaen'jenga tevaen nanimba ²⁵leví aindecungu, tsa Na'su Chiga a'i'ccu injancco'fa'cho cafonma angasundeccungu, qqen su:

²⁶"Va manda'cho tevaen'jema isupa Na'su, que'i Chiga a'i'ccu injancco'fa'cho cafon utufanga ejian'faja. Tsa'caen an'bian'faja que'i egae tsincon'choma injan'jeñe."

Moisés pasi a'tu'cho

34 ¹Moisésja Moab a'i menia'ñe sombopa Nebo ccotta'ccoma ansundepa Pisga tsutopanga ccutsu Jericó canquema isevetsse. Tse'tti ccutsusi tsu Na'su Chiga Dan andepi pa'cco Galaad andema tisenga canjaen. ²Nane Neftalí, Efraín, toya'caen Manasés andema canjaemba pa'cco Judá andema'qqe canjaen Mediterráneo marpi ³Toya'caen Néguev ande, Jordán na'en sinjunccu, Jericó fae'ngatssia ande, tsa Palmera canquue, Zoar canquuepi tisenga canjaen. ⁴Canjaemba Na'suja tisema su:

“Va tsu ña Abraham, Isaac, Jacobnga'qqe tise'pa dushundecunga afeye qqen tansintse su'cho ande. In'jamba gi quema canjaen que ca'niñambia'qqe tso'fei'ccu atteye.”

⁵Tsa'caen tsu Moisés, tsa Chigama shondo'suja, Na'su suqquia'caen Moab andeni pa. ⁶Papa Moab ande'su Bet-peor isevetssia sinjuncuni tiseja a'tuye. Nane ja'ño a'tapan majañi'qqe atesu'fambi tise mani atuye'chove. ⁷Ciento veinte canqqe'fave an'biamba tsu pa. Tsa'ma tise tso'fe toya ñotssiyi tise'qqe toya quinse'tssiyi pa.

⁸Pasi israendeccuja treinta a'tave tse'tti Moab a'i menia can'jemba tisene ina'jen'fa, injan'jemba ñombi'ye'cho naniña'ngae. ⁹Nane Moisés tisu tivei'ccu Nun dutssi'ye Josuénga pporaensi Josuéja osha'chove in'jan'cho qqendya'pai'ccu mandasi israendeccu tisema pañamba Na'su Moisésnga mandaqquia'caen tson'fa.

¹⁰Tsa'ma faesu Chiga aya'fama afa'suja Moisés'cantsse Israelnga attiambi. Nane Moisésja Na'su Chigai'ccu cambajunaccu condasecco'je. ¹¹Na'su Chiga mandasi Moisésja osha'cho canjaen'choma agattoen'choma'qqe attian Egipto'su na'su faraón, tisema shondosundeccu, poi egiptondeccunga'qqe. ¹²Nane jimbi tsu faesu tisia'caen israendeccunga osha'cho ti'tsse'tssia tson'choma canjaemba Na'su Chiga oshacho'choma canjaen'suve.

Josué

Moisés pasi tisema shondo'su, Josué, ca'nimba israendecuma angacan. Na'su Chiga fuitesi israendecuja tise'panga afe'cho andenga ca'nimba tseni'su aindecuma patsu'fa. Na'su tisema in'jaensi Josuéja tise'pa patsupa can'jen'fa'chone conda.

Chiga Josuéma ttu'se'cho

1 ¹Na'su Chigama shondo'su Moisés pasi Na'suja Nun dutssi'ye Josué, tsa Moisésma fuite'sui'ccu afapa qqen su:

²“Ñama shondo'su Moisésja tayo pa. Tsa'cansi ja'ñojan que qui poiyl'cco va israendecui'ccu ñoñamba Jordán na'ema isepa ña que'inga afeya'cho andenga ca'niña'cho. ³Nane ña Moisésnga suqquia'caen gi pa'cco mani que'i tsu'ttei'ccu tsui'je'cho andema que'inga afeya. ⁴Que'i andeja a'li menia'ñe ashaemba já Líbano toya'caen tsa rande Eufrates na'empí ne'pitssiya. Nane pa'cco hitita'su ande mar randepi gi que'inga afeya. ⁵Pa'cco que cansuite gi quema quiñaña faesu quema joqqitssiansa'ne. Ña Moisési'ccu can'jenqquia'caen gi quema'qqe quiñaña. Mínguite'qqe gi quema tisuveyi catiya'bi. ⁶Dyombi'tsse quínse'tsse ccutsuja. Tayo gi va aindecumbe tayopisundecunga conda va andema afeya'chove. Queja tsama attu'faen'su. ⁷Dyombi'tsse quínse'tsse ccutsuja. Ñotsse in'janjan pa'cco ña Moisésnga su'cho manda'choma pañamba tsoñe. Ni ma'ttíveyi'qqe aqqe'pambitssse tansintssse tsonjan ñotsse naníngeye. ⁸Anttejama va Chiga manda'choma cambia afaye. A'ta, cose'qqe tsane in'janjan pa'cco tsanga tevaenqquia'caen tsomba canseye. Tsa'caen tsomba qui ñotsse nanimba ñotsse an'biaña. ⁹Ña gi manda: Dyombi'tsse quínse'tsse ccutsuja. Dyojama ni ñoquimbijama. Nane ña, que Na'su gi mani jacan'ni'qqe fae'ngae que'l'ccu jacaña.”

Josué andema patsuye ñoña'jen'cho

¹⁰Chiga tsa'caen susi Josuéja israendeccu'su nasundecuma qqen manda: ¹¹“Japa poiyl'cco a'inga conda'faja cuintsu osha'chove ñoña'faye. Tres a'tangae gi Jordán na'ema ise'faya'cho Na'su ingi Chiga inginga afeye su'cho andema itsapa an'biaña. Ingi'beya tsu.”

¹²Tsa'ma Josuéja Rubén aindecu, toya'caen Gad aindecu, enttinge Manasés aindecunga'qqe afapa qqen su:

¹³—In'jan'faja Na'suma shondo'su Moisés que'inga qquen su'choma: '¡Na'su que'i Chiga tsu que'i ño'faya'chove va andema que'inga afe!' ¹⁴Tsa'cansi tsu Moisés va Jordán na'ema chiga sombo'jefa'su andema que'inga afe'tti que'i pushendeccu, que'i dushundeccu, toya'caen que'i aña'cho'qqe can'jen'faya. Tsa'ma poiyi'cco tsandiendeccu majan geraeñe atesu'chonddecuta tsu tise'pa matichi, oma'ccoma isupa geraeñe ja'faya'cho. Nane que'i antian israendeccu'ccu va Jordán na'ema isepa fuite'faya'cho ¹⁵tsa andema patsuya'ngae. Tsa'caen tsu tsoña'cho Na'su Chiga afesi tise'pa ño'faya'ngae. Nane que'inga afe'quia'caen afesi tise'pa'qqe tsa Chiga afe'cho andembe nasundeccuve da'faya'ngae tsu fuite'faya'cho. Tsa'ma tsa'caen afesi qui toequi shandaye osha'fa Chigama shondo'su Moisés que'inga afe'cho Jordán na'ema chiga sombo'jefa'su andema an'biamba canseye.

¹⁶Tsonsi tsu Josué'nga su'fa:

—Que mandaquia'caen gi tson'faya. Mani que moe'ninda gi tzeni ja'faya. ¹⁷Nane Moisésma pañaquia'caen gi quema'qqe paña'faya. Tsa'ma Na'su que'i Chigaja Moisésma angacanquia'caen tsu quema'qqe angacaña'cho. ¹⁸Majan quema pañañe chi'ga'ninda tsu tsamajan fl'ttiya'cho. Nane dyombi'tsse quinse'tsse ccutsuja.

Rahab jacansundecuma fuite'cho

2 ¹Tsa'caen conda nanimba Josuéja Sitim canqueni can'jemba a'tutsse moe dos a'i cuintsu a'tutsse japa atte'faye. Moe'jemba qquen su: “Japa andema cambia Jericó canquema'qqe ñotsse can'faja.” Tsa'caen mandasi Jericóni japa tsa'oma afe'su Rahab tsaoni ca'nimba can'jen'fa. ²Tsonsi cca'indeccuja Jericó'su ande na'sunga qquen conda:

—¡Que canjan! Majan israe'su a'i a'tutsse andema atteye ja'ño cose jipa tzeni can'jen'fa.

³Tsa'caen susi Jericó na'suja Rahabma mandapa su:

—Queni jipa que tsaoni canjensundecuma somboenjan. Nane tsendeccuja a'tutsse va andema cañe jacansundeccu tsu.

⁴Tsa'ma pushesuja tsa dos a'ima tayo a'tupa na'su manda'choma pañamba su:

—Ju, tsa a'i ñani ji'fa. Tsa'ma atesumbi gi tise'pa mane ji'chove.

⁵Chiga amppiji'ni toya canqque sombo'ttima piccombi'te tsu sombopa ja'fa. Atesumbi gi tise'pa maningae ja'chove. Tsa'ma jundeyi tise'pama omboemba ja'ta qui utunga indi'faya.

⁶(Tsa'ma tsa'caen supa tayo tsu tsandiendecuma tsao'cco omba'su ppappaconga ansundiamba a'tu tzeni linome somboenqqe'su shoshovima sanjan'jen'chombe tsosicunga.)

⁷Tsa'caen susi na'sumbe sundarondeccuja a'tutsse jacansundeccuve tta'ttaye ja'fa Jordán na'ema cca'yapa ise'je'cho tsaiquini. (Sundarondeccu canqque'ye tta'ttaye sombosi tsu canqque sombo'ttima picco'fa.)

⁸A'tutsse jacansundeccu toya anambi'te pushesuja tsao'cco omba'su ppappaconga ansundepa tise'pama su:

9—In'jan gi Na'su Chiga tsu va andema que'inga afe. Nane poiya'cco va ande'su aindeccu gi que'ima dyojo'fa. Nane paye dyojopa gi ñoa'me dyopa ttun'dundu'je'fa. 10Paña'fa gi ma'caen que'i Egipto'ye sombopa jayisi Chigaja Cu'a marma samboen cuintsu que'i iseye. Toya'caen Jordán na'en jonifani'su Sehón, Ogma'qque, tsa amorreo'su nasundecuma patsupa que'i sefaen'choma pañamba gi ti'tsse dyo'fa. 11Nane ingi injama'choma chapiansi gi osha'fambi. Na'su que'i Chiga tsu sefacconi can'jemba ñoa'me va andenga'qque manda. 12Tsa'cansi chigáne Na'su Chiga caña'jen'ni ñanga tansintsse su'faja ña que'ima ñotsse tsonquia'caen ccane'qque que'ija ingima ñotsse tsomba ña antiandecuma ccushaëña'chove. ¡Tansintsse canjaen'chove ñanga canjaen'faja, 13que'i ña yaya, ña mama, ña antiandeccu, tise'pa tsa'o'suma'qque ccushaëña'chove!

14Tsonsi a'tutsse jacansundecuja su'fa:

—Ingima ccushaen'chone gi ccane'qque que'ima ccushaen'faya. Que'i ingine a'tiamba condambi'choa'ne gi que'ima ccushaemba ñotsse tson'faya, Na'su Chiga va andema inginga afesi.

15Tsa'caen tansintsse su'fasi pushesuja tise tsa'o'su ventana'ñe o'fama tandan dusiamba canquema ttu'cho ccavofanga tise'pama andiamaña. Nane tise tsa'ota tsu canquema ttu'choi'ccu fae'ngatssi. 16Tsa'caen moe'jemba qquen su:

—Ja'faja ccotta'cconga que'ive ttattasundeccu atte'fasa'ne. Tseni tres a'tave a'tupa can'jen'faja tise'pa antepa toequi canqueni jiya'ngae. Tise'pa jisi qui ccushapa toequi tisu andeni ja'faya.

17-18Toya'caen tsandiendeccu tsu tisema qquen su'fa:

—Que ingima andian'je'cho ventananga va cu'a o'fama tandan'faya'cho ingi va andema patsuye jipa atteya'chove. Toya'caen que yaya, que mama, que antiandeccu'qque tsu va tsaoni bo'faya'cho. Tsa'caen tsombian'da ingi que'ima ccushaëne tansintsse su'choja ñoa'me bareya'bi tsu. 19Nane majan que tsa'o'ye sombopa canque tsaiqui'ye jacansi tisema majan ingi'su fi'tti'nija tisuyi tsu shacapa. Ingija shacapambi. Tsa'ma majan que'l'ccu tsaoni can'jen'choma majan ingi'su fi'tti'ninda gi shacapa'fa. 20Toya'caen que ingi jasi cca'indeccunga ingine conda'ninda gi ingi tansintsse tsoñe su'choma tson'faya'bi.

21—Ñotssi tsu, que suquia'caen.—qquen tsu pushesuja su.

Tsa'caen supa tise'pama andianmoemba tsa cu'a o'fama tandan dusian ventananga.

22A'tutsse sombopa ccotta'cconga japa tres a'tave a'tu'fa.

Sundarondecuja pa'cco tsaiqui'ye tta'tta'ma attembe'yi shandapa toequi Jericóni ji'fa. 23Tsonsi a'tutsse jacansundecuja toequi shandaye ashaen'fa. Ccotta'cco'ye andepa na'ema cca'ya isepa Josuéni ja'fa. Japa Josuénga pa'cco tise'pa ma'caen da'choma condase'fa. 24Qquen tsu su'fa: “Ñoa'me tsu Na'suja pa'cco andema inginga afe. Poiya'cco a'i tsu ingima dyopa canse'fa.”

Israendeccu Jordán na'ema ise'cho

3 ¹Ccaqui a'ta sinte'yi Josué, poi'yi'cco israendeccu'ccu Sitim canque'ye sombopa Jordán naeni ja'fa. Tseni can'jemba ñoña'fa tisupa iseya'chove. ²Tres a'ta can'jemba nasundeccuja poi'yi'cco a'i can'jen'cho'ye japa ³aindecuma qquen manda'fa: “Na'su Chiga a'l'ccu injancco'fa'cho cafonma, toya'caen tsama anga'su Chigama afa'su levítasundecuma atte'ta que'i'qqe ñoñamba sombopa fae'ngae omboemba sepacoe ja'faya'cho. ⁴Tsa'caen tsomba qui atesu'faya maningae jaya'chove. Nane atesu'fambi qui que'i ja'ño jaya'chove. Tsa'ma panshaen catsembe'yi fae kilometroa'caen anttepa omboemba sepacoe jayi'faja.”

⁵Tsomba Josuéja aindecuma su: “Tisupama ñoña'faja Chiganga ccutsuquua'cantsse. Nane tu'i tsu Na'su Chigaja que'i'ccu ccaningae tsoña.” ⁶Toya'caen tsu Chigama afasundecuma qquen manda: “Chiga a'l'ccu injancco'fa'cho cafonma opipa o'tie japa na'ema ise'faja.”

Tsa'caen susi tsu opipa a'ima o'tie ja'fa. ⁷Tsonsi Na'suja Josuéma su: “Ja'ño gi quema ti'tsse'tssia've tsoña cuintsu poi'yi'cco a'i in'jan'faye ma'caen ña Moisésma fuitequua'caen quema'qqe fuite'choma. ⁸Ña a'l'ccu injancco'fa'cho cafonma anga'su Chigama afasundecuma condaja cuintsu Jordán na'en otafanga nepi'ta cca'ya ccutsu'faye na'enga.”

⁹Tsonsi Josuéja israendecunga su: “Vani catsepa paña'faja Na'su que'i Chiga su'choma. ¹⁰Tise canjen'choma attepa in'jan'faja ñoa'me cansian Chiga ingi'ccu can'jemba ingima o'tie cananeondeccu, hititandeccu, heveondeccu, ferezeondeccu, gergeseondeccu, amorreondeccu toya'caen jebuseondeccuma'qqe metsse tteya mañaña'choma. ¹¹¡Que can'faja! Poi ande'su Na'su a'l'ccu injancco'fa'cho cafon tsu que'ima o'tie Jordán na'ema iseye jaya. ¹²Tsa'cansi ttu'se'faja poi doce'su israe'su aindecu'suma fae'cco, fae'ccove cuintsu doce tsandieve nepiye. ¹³Nane Chigama afa'su, poi ande'su Na'su a'l'ccu injancco'fa'cho cafonma angasundeccu Jordán na'enga tsui ccutsu'ninda tsu na'en ai'je'choja pasapa tse'ttinga bo ccutsuya.”

¹⁴Tsa'caen susi aindecuja ñoñamba sombo'fa Jordánma iseye. Chigama afasundeccu o'tie ja'fa Chiga a'l'ccu injancco'fa'cho cafoin'ccu. ¹⁵Nane tsequi tsu Jordán na'en ñoa'me bo'iave ji, trigoma taite nepisi. Tsa'ma Chiga a'l'ccu injancco'fa'cho cafonma anga'su Chigama afasundeccu Jordáni nepipa otafanga cca'ya ccutsusi ¹⁶na'en ai'je'choja pasa. Nane biani tsu tsa'caen bo ccutsu Adam canque jini. Tsa Adam tsu Saretán pporotsse. Tsa'caen bo ccutsusi a'ningae Pa'cho marningae ai'je'cho'qqe samba. Tsa'caen dasi poi'yi'cco a'i tsui ise'fa Jericó isevetsse. ¹⁷Na'su Chiga a'l'ccu injancco'fa'cho cafonma anga'su Chigama afasundeccuja Jordán na'en enttingeni ccutsu'fa san'an'ni. Tsa'caen ccutsu'fasi poi israendeccu tise'pama panshamba ccavofanga ise'fa. Nane ñoa'me santsse sambasi tsu tsa'caen ise'fa.

Patuve Jordán na'ema somboen'cho

4 ¹Poiyi'cco a'i tsa'caen Jordánma isefasi Na'su Chigaja Josuéma su: ²“Tsa doce tsandieve ttu'sechondeccu, poi doce israe'su aindeccu'suma fae'cco, fae'cco ³mandaja cuintsu Jordán na'en enttingeni japa Chigama afasundeccu ccutsu'ttima doce patuve isu'faye. Nane poiyi'cco tsu fae patuve isupa opipa jonifani angapa ccuñña'faya'cho que'i mani ja'ño cose anaña'ttinga.”

⁴Tsa'caen susi Josuéja tise attufaen'cho dose israe'su aindeccu'su tsandiendecuma ttu'sepa ⁵su: “Jordán enttingeni japa Chiga, que'i Na'su, a'i'ccu injancco'fa'cho cafonga catse'faja. Poiyi'cco tsu fae patuve isupa opipa iya'cho tsai'ccu doce israe'su aindeccuve canjaeñe. ⁶Tsa patu tsu que'i jai'ngae canjaeña'cho. Nane que'i dushundeccu: ‘¿Jongoesune tsu va patuja canjaen?’ qqen su'ninda ⁷tise'panga conda'faja ma'caen Na'su Chiga a'i'ccu injancco'fa'cho cafon Jordán na'ema isesi na'en ai'je'cho pasa'choma. Tsa Jordán na'ema ise'je'ni tsu na'enjan ai'jembi. Va patu tsu tsangae Israel aindecuma tise'pa va'ttinga ma'caen da'choveinjaen'jeña.”

⁸Josué tsa'caen susi israendeccuja tsa'caen tson'fa. Nane Na'su Josuénga condaquua'caen Jordán enttingema doce patuve isu'choma tsa doce israe'su aindeccu tise'pa can'jeñani opipa anga'fa. ⁹Toya'caen Josuéja faesu doce patuve isupa tsa Chiga a'i'ccu injancco'fa'cho cafonma anga'su Chigama afasundeccu ccutsu'ttinga boñamba ccutsutsian. Ja'ño a'tapan tsu tse'tti ccutsu'fa.

¹⁰Tsa'caen tson'jen'fasi Chiga a'i'ccu injancco'fa'cho cafonma anga'su Chigama afasundeccuja toya Jordán enttingeniñi ccutsu'fa. Nane pa'cco Na'su Chiga Josuénga manda'choma aindeccu naniña'ngae tsu tsa'caen enttingeni ccutsu'fa. Nane pa'cco Moisés Josuénga condaquua'caen tsu tson'fa. Tsa'cansi aindeccuja junde poiyi'cco isepa ¹¹camboen'jen'fa'ni Chigama afasundeccuja Na'su Chiga a'i'ccu injancco'fa'cho cafoin'ccu ise'fa. ¹²Toya'caen Na'su Chigambe israendeccu'su sundarondeccuja, o'tie tsu Rubén aindeccu, Gad aindeccu toya'caen enttinge Manasés aindeccu'su tsandiendeccu'qqe isepa matichi, oma'ccoma'qqe Moisés mandaquua'caen isian'fa Jericó'su sinjuncuni. ¹³Cuarenta mil tsandiendeccu tsu tsa'caen ñoñamba iyiccoye ise'fa. ¹⁴Tsequi al'ta tsu Na'suja Josuéma ti'tsse'tssia've tson cuintsu Moisés cansuite in'janquua'caen tisema'qqe ñotsse in'jamba paña'faye.

¹⁵Tsa'caen tsomba Na'su Chigaja Josuéma su: ¹⁶“Ña a'i'ccu injancco'fa'cho cafonma anga'su Chigama afasundeccuma mandaja cuintsu Jordán na'en'ñe sombo'faye.”

¹⁷Tsa'caen susi Josuéja manda: “Jordán na'en'ñe sombo'faja.” ¹⁸Tsa'caen susi Chigama afasundeccu san'anga sombosi tse'faei'ccuyi Jordán na'en'su tsa'ccuja toequi bo'iave jipa tayoacaeñi da.

¹⁹Nane primer ccovu decimo al'ta tsu israendeccuja Jordán na'ema isepa Gilgalni ansundepa can'jen'fa. Gilgaltu Jericónima chiga sombo'jefani. ²⁰Tse'ttinga tsu

Josuéja tsa doce patuve Jordán na'ema somboen'choma ccutsutsian. ²¹Ccutsiamba israendecunga su: “Jai'ngae que'i omba'su dushundeccu tise'pa yayandecuma ‘¿Jongoesune tsu va patuja canjaen'fa?’ qquen ñajampaña'fa'ninda ²²tsendecunga su'faja: ‘Israendecuja san'añe Jordán na'ema ise'fa. ²³Na'su que'i Chigaja Jordánma samboemba ronda'je cuintsu poi'cco ingi ise'faye. Nane tise tayoe Cu'a marma samboensi ingi tayopisundeccu isequia'caen tsu Jordánma'qqe samboen. ²⁴Tsa'caen tsu tson cuintsu poi ande'su aindecu atesu'faye Na'su Chiga osha'choma oshacho'chove. Toya'caen tsu tsa'caen tson cuintsu ingija tsangae dyoe'sui'ccu Na'su Chigama injan'jeñe.’”

Gilgalni ttonoma chhiyitevaen'cho

5 ¹Na'su Chiga Jordánma samboensi israendeccu ise'choma pañamba chiga amppi'jeni canjensundeccu, tsa amorreo'su nasundeccu toya'caen mar ofafa'su cananeo'su nasundeccu'qqe ñoa'me dyopa tise'pa injama'choni chape'fa. Nane dyojo'fa tsu israendecui'ccu iyiccoye.

²Tsequi a'ta tsu Na'suja Josuéma qquen manda: “Mandaja cuintsu ccoimpama chhichhi'ccove ñoñamba ccase israe'su tsandiendecumbe ttonoma chhiyitevaen'faye.”

³Tsa'caen susi Josué mandasi ccoimpa chhichhi'ccove ñoñamba tsa Aralot cotta'cconi israe'su tsandiendecumbe ttonoma chhiyitevaen'fa. ⁴Nane Egiptone sombo'cho tsandie sundarondecuja a'li menia tsu poi'cco pa'fa. ⁵Poi'cco Egiptone sombo'cho tsandiendecuja chhiyitevaen'cho tsu, “Israendeccu gi” qquen canjaeñe. Tsa'ma poi'cco a'li menia isu'choja toya me'in. ⁶Nane israendeccu cuarenta canqqe'fave a'li menia jacamba poi'cco Egiptone sombo'cho tsandiendeccu, sundarove ca'niñe nepi'chondecuja, tayo pa'fa. Nane tise'pa tayopi'su coenzandecunga Na'su Chigaja andema afeye su, chocho toya'caen tuño cuñajun'cho'qqe shacambitssia andema. Tsa'ma tsendeccu ñotsse pañambisi Na'suja tsendecuma ñoa'me su'choi'ccu su cuintsu tise afeye su'cho andema attembe'yi pa'faye. ⁷Tsa'caen supa tise'pa dutssiyendecunga afeye susi Josuéja tise'pa dushundecuma boñamba manda cuintsu tsendecumbe ttonoma chhiyitevaen'faye. Nane tsendecuja a'li menia isu'chopa toya chhiyitevaembindequua tsu. ⁸Poi'cco tsa'caen chhiyitevaengepa tsu tise'pa carpani can'jen'fa ccushaya'ngae. ⁹Tsonsi Na'su Chigaja Josuéma su: “Va chhiyitevaen'choi'ccu gi que'i Egiptoni can'jemba ansange'choma joqqutssian.” Tsa'cansi tsu va'ttija Gilgal qquen inisecho'cho.

¹⁰Ccovu'su catorce a'ta'su sime toya Gilgalni tsa Jericó sinjuncuni can'jemba israendecuja Chiga fi'ttimbe panshan'choma panshaen'fa. ¹¹Tsequi tsu cupana'cco me'choa pan toya'caen trigoma matssan'choma an'fa. Tsa'ma tsequi a'ta pasasi ccaqui tsu Jericó andeni jincho anqqe'suma an'fa. ¹²Tsa'caen an'fasi ccaqui a'ta sefaccone amppi'je'cho anqqe'su manájan pasa. Ti'tsse manájan amppimbi. Tsa'ma tsa canqqe'fa tsu cananeo ande'su anqqe'suma amba canse'fa.

Chigambe sundaroma cachuicco'cho

¹³Tsa'caen Jericó canqqe pporotsse can'jemba Josuéja asuccocamba a'ima atte, sundaro matichima isu'cho tise isevetsse ccutsu'choma. Attepa tisinga catsepa qqen ñajampaña:

—¿Que'qqe ti qui ingi'su? ¿Tsambi'ta ingima iyiccayesundeccu'su?

¹⁴A'ija su:

—Ni que'i'su ni que'ima iyiccayesundeccu'sumbi gi. Tsa'ma Na'su Chigambe sundaro na'su gi ja'ño ji.

Tsa'caen susi Josuéja andenga puntssamba tise ma ñajampaña:

—¿Jongoe qqen tsu Na'suja ña tise ma shondo'sunga su?

¹⁵Tsa'caen ñajampañasi Na'su Chigambe sundaro na'suja su:

—¡Que sapatoma shichhaja! Va'tti que ccutsu'ttija Chiga ande tsu.

Tsa'caen susi Josuéja tsa'caen tson.

Ma'caen Jericóma patsuya'cho

6 ¹Tsa Jericó canqqeja ta'etsse picco'cho tsu. Nane israendecuma dyopa tsu majañi'qqe sombol'jeye ni cani'jen'fambi. ²Tsa'cansi Na'suja Josuéma su: “¡Que canjan! Tayo gi Jericóma patsupa que'inga afe. Nane tsa canqqe na'su toya'caen poiyl'cco sundarondeccuma'qqe gi que'inga afe. ³Queja poiyl'cco que sundarondeccui'ccu ja'ño a'ta Jericó canquema fae seyi shoquendi'faja. Seis a'tave tsu tsa'caen tsoña'cho. ⁴Siete Chigama afasundeccu oveja quitsa'ye can'cho tsonjen'choma an'bian'chondeccu tsu Chiga a'i'ccu injancco'fa'cho cafonma o'tie jaya'cho. Toya'caen septimo a'ta tsu ti'tsse, siete se, canquema shoquendiya'cho. Nane Chigama afasundeccuta tsu tsonjen'choma jeñamba siete se shoquendi'jeya'cho. ⁵Tsomba tsendeccu tsonjen'choma bia'ave jeñasi paña'da poiyl'cco a'i tsu fae'ngae fundo'faya'cho. Tsa'caen fundosi tsu canquema ttu'choja osuiya. Osuisi tsu poiyl'cco a'i tansintsse ansundepa ca'nimba iyicco'faya'cho.”

⁶Tsa'caen pañamba Josué, poiyl'cco Chigama afasundeccuma ttu'sepa tise'pama su: “Enttinge que'i'su Na'su Chiga a'i'ccu injancco'fa'cho cafonma opisi tsu toya'caen siete que'i'su oveja quitsa'ye can'cho tsonjen'choi'ccu tsama o'tie jeñamba jaya'cho.” ⁷Toya'caen aindecuma su: “¡Japa canquema shoquendi'faja! ¡Sundarondeccu'qqe Na'su Chiga a'i'ccu injancco'fa'cho cafonma o'tie japa tsa canquema poiyl'cco shoquendi'faja!”

⁸Tsa'caen susi poiyl'cco Josué mandaquua'caen tson'fa. Nane tsa siete Chigama afasundeccuja Na'su Chiga manda'cho siete can'cho tsonjen'choma angapa jeñá jacan'fa. Tise'pama omboe tsu faesundeccuja Na'su Chiga a'i'ccu injancco'fa'cho cafonma opipa jacan'fa. ⁹Nane jeñamba jacan'su Chigama afasundeccuma o'tie tsu oma'ccoma anga'su sundarondeccuja jacan'fa. Toya'caen injancco'fa'cho cafonma sepaccofae faesu coira'su sundarondeccuja jacan'fa. Anttembe'yi tsu tsonjen'choma

jeña'fa. ¹⁰Tsa'ma Josuéja tayo aindecuma su cuintsu opitsse jacan'faye tise mandaya'ngae. Nane quian'me afambe'yi opitsseyi jacan'faya'cho. Tsa'ma maqui tise mandasi cuintsu quian'me fundo'faye.

Jerico canque osui'cho

¹¹Tsa'caen mandasi Na'su Chiga a'i'ccu injancco'fa'cho cafonma opipa canque'ye shoquendipa toequi poi'cco tise'pa can'jeni japa ana'fa. ¹²Ccaqui a'ta sinte'yi Josué jangisi Chigama afasundeccuja ccase Na'su Chiga a'i'ccu injancco'fa'cho cafonma opi'fa. ¹³⁻¹⁴Tsa siete Chigama afasundeccu siete tsonjen'choma jeñamba Chiga a'i'ccu injancco'fa'cho cafonma o'tie ja'fa. Tsendeccuma o'tie tsu oma'ccoma anga'su sundarondeccu ja'fa. Toya'caen injancco'fa'cho cafonma sepaccofae tsu faesu coira'su sundarondeccu ja'fa. Segundo a'ta'qqe tsa'caeñi can'cho tsonjen'choma jeña'jemba fae seyí canquema shoquendipa toequi tise'pa can'jeni ja'fa. Seis a'tave tsu tsa'caen tson'fa.

¹⁵Tsomba septimo a'tave a'tasi sinte'yi jangipa jajapa siete se canquema shoquendi'fa. Nane tayoe jacanquia'caen jacan'ma tsequija siete se canquema shoquendi'fa. ¹⁶Septimome shoquendi'fasi Josuéja aindecuma qqen manda: “¡Fundo'faja! ¡Nane Na'su Chiga tsu va canquema patsupa que'inga afe!”

¹⁷Nane tayo tsu Josuéja tise'panga qqen conda: “Pa'cco canque, toya'caen osha'cho tsani jincho'cho'qqe Na'su Chigambe tsu. Tsa'cansi tsu pa'ccoma me'tsse sefaeña'cho Tise'be qqen canjaeñe. Tsa'ma jo'su Rahab, tsa tsa'oma afe'su, toya'caen poi'cco tise tsaoni canjensundeccuveyi tsu ccushaeña'cho. Nane tise'yi tsu ingi moesi a'tutsse jacansundeccuma fuitepa ccushaen'cho. ¹⁸Tsa'ma tsa canqueni jincho osha'choja Na'su Chigambesi tsama pporaenjama isupa tsuma dañosa'ne. Toya'caen majan tsa'caen tson'da qui Israel aindecuma shacapave tsomba daño'faya. ¹⁹Nane pa'cco cori, totoacori, toya'caen cu'a yoshavama ñoña'cho, faesu yoshavama ñoña'cho'qqe Na'su Chigambesi tsu tise'be boña'jen'chonga boñamba an'biaña'cho.”

²⁰Josué tsa'caen mandasi tsonjen'choma jeña'fasi aindecu'qqe poi'cco fundo'fa. Tsa'caen jeñamba quian'me fundo'fasi canque ttuccuja osuipa amppi. Tsónsi poi'cco a'i tansintsse ansundepa ca'nimba canquema patsu'fa. ²¹Pa'cco tsa canqueja Na'su Chigambe qqen in'jamba pa'cco tsani cansian jincho'choma matichi'ccu fittitti'fa. Nane tsandie, pushesu, chu'a, coenzandeccu, aiña'cho vaura, aiña'cho oveja toya'caen boroma'qqe pa'ccoma fitti'tti sefaen'fa.

²²Tsónsi Josuéja tsa dos a'tutsse jacansundeccuma qqen manda: “Rahab tsaoni japa tisema, toya'caen pa'cco tise'bema'qqe somboen'faja. Nane que'i Rahabnga ñoame su'chove suquia'caen tsu tsoña'cho.” ²³Tsa'caen mandasi a'tutsse jacan'su tsandiendeccuja Rahab tsaoni ca'nimba Rahab, tise yaya, tise mama, tise antian toya'caen pa'cco tise'bema somboemba israendeccu can'jen'ttimbe ccavofanga

angapa coira'je'fa. ²⁴Rahabpama somboemba pa'cco canquema oque cati'fa. Nane pa'cco canqueni osha'cho jincho'choma'qqe oque cati'fa. Tsa'ma pa'cco cori, totoacori, cu'a yoshavama ñoña'cho toya'caen faesu yoshavama ñoña'choma'qqe Na'su Chigambe boña'jen'chonga boñamba an'bian'fa. ²⁵Josuéja jo'su Rahab, tise antiandecu, toya'caen pa'cco tise'beveyi ccushaen. Nane Josué moe'cho a'tutsse Jericóni jacansundeccuma tise fuitapa a'tupa ccushaen'chone ccushaen'fasi tsu ja'ño a'tapan Rahab omba'su dushundeccuja israendeccu'ccu fae'ngae canse'fa.

²⁶Tsequi a'ta Josuéja ñoa'me su'chove afapa qquen su: “Majan va Jericó canquema ccase ccutsiancañe qquen ashaen'da ñoa'me Na'su Chiga chi'ga'choma tsu tsoña. Nane canquiañe patuma ccuiñañe ashae'ninda tsu tise aisheve isu'cho dutssi'yeja paya. Toya'caen nanijimba canqqe sombo'tti'su piccofin'dive ccutsian'jensi tsu tise dutssi'ye chu'aja paya.”

²⁷Tsa'caen Na'su Chiga Josuéma fuitesi poiyyi'cco tsa ande'su aindecu tise tson'choma atepa asi'ttaen'fa.

Acán egae tsincon'cho

7 ¹Tsa'ma fae'cco Judá aindecu'su, Acán qquen inisecho'choja, injama'cho shacapa Chigambe jincho qquen in'jamba isu. Nane Acán, tsa Carmi dutssi'ye tsu tsa'caen se'pi'choma isu. (Carmi tsu Zabdi dutssi'ye. Zabdi tsu Zara dutssi'ye. Poiyyi'cco tsu Judá omba'su dutssiyendeccu.) Acán tsa'caen Na'su Chiga se'pi'choma isu'chosi Chigaja ñoa'me poiyyi'cco israendecuma iyicca'ye. Tsa'cansi tise'pa'qqe tsambe shacai'ccuyi shacapave da'fa.

Israendeccu shacapapa patsuye'cho

²Josuéja Acán tson'choma atesumbipa injanga majan aindecuma manda moe cuintsu Jericóni sombopa Hai canqueni japa a'tutsse can'ga'faye. Hai canqqe tsu Bet-avén jin'tti Betel canquema chiga sombo'jefani. Mandasi aindecuja japa Hai canquema a'tutsse can'ga'fa. ³Can'gapa jipa Josuéng qquen conda'fa: “Poiyyi'cco sundarondeccu jambi'ma aquia dos tsambi'ta tres mil tsu Hai canquema patsu'faya. Poiyyi'ccoma moembecanjan, tsa canqqe'su ingi'ccu iyiccoya'chondeccuja re'ricco'fa tsu.”

⁴Tsa'caen su'fasi aquia tres mil a'ima moesi Hai canqqe'su aindecuja tise'pama patsupa tteya mañamba ⁵treinta y seis israendecuve fi'tti'fa. Nane canquema sombo'je'tti'ye ashaemba israendecuma mandiamba patuma chattupa somboen'jen'cho andeni anga'fa. Israendeccu tzeni andesi Hai canquesundeccu fitti'ttisi tise'pa injama'cho shacapa ñoa'me chape'fa.

⁶Tsama pañamba Josuéja iyicca'yepa tisu ñombi'ye'choma canjaeñe in'jamba tisu ondiccujema chi'ttapa Chiga a'i'ccu injancco'fa'cho cafonga catsepa cambia'ju'i'ccu andenga puntssan ccui. Nane cose'tsse tsu tsa'caen puntssan ccui. Israe'su coenzandeccu'qqe tsa'caen tsomba ande'su totopa'ma tisupa tsovenga ganga'fa. ⁷Tsa'caen tsomba Josuéja su:

—Na'su, Chiga Osha'choma Oshacho, ¿jongoesie qui va aindeccuma Jordán na'ema isiamba afe amorreondeccunga cuintsu ingima sefaen'faye? Nane toya jonifani can'jen'choecan'da gi avujatsse opatsse can'jen'faye'can. ⁸Na'su, israendeccu tsa'caen patsuye'fa'ninda ¿jongoe qqen gi suya? ⁹Nane cananeondeccu, cca'li va andeni can'jensundeccu'qqe vama pañamba ingima shoquendi ttupa sefaen'faya. Tsa'caen tson'fa'ninda ¿jongoesuya tsu que inise ti'tsse'tssiata?

¹⁰Tsonsi Na'suja Josuéma su:

—¡Jangija! ¿Jongoesie qui tsa'caen andenga puntssan? ¹¹¡Israendeccu tsu egae tsincon'fa! Nane ña tise'pai'ccu injancco'fa'choma catipa egae tsincon'fa. Ñaña an'bian'choma tsu isu'fa. Cca'na'fa. Afopoen'fa. Ñambema tsu tise'pa an'bian'chonga a'tu'fa. ¹²Tsa'camba tsu israendeccuja tise'pai'ccu iyiccosundeccui'ccu cambajunaccu ccutsupa iyiccoye osha'fambi. Nane israendeccuja tisupa shacaemba tsa'caen tisupa sefaya'chove tson'da tsu ja'ñojan dyopa ccuya'je'faya'cho. Toya'caen ña sefaeña'cho manda'choma que'li uta'tsse sefaembian'da gi ñajan que'l'ccu ti'tsse can'jeña'bi. ¹³Japa aindeccuma mandaja cuintsu tise'pa injama'choma ñoña'faye, tu'li ñanga ccutsuya'chove. Nane ña, Na'su, tsa israendeccumbe Chiga gi qqen su: 'Tsa ña metsse que'li catiya'chove anttecho'suja toya tsu israendeccuni can'jen. Tsama que'i'ye joquitssiya'mbi'ta qui que'l'ccu iyiccosundeccui'ccu cambajunaccu ccutsuye osha'fambi.' ¹⁴Tsa'camba tsu tu'l'ija poi israendeccu'su aindeccu ñanga canjaen'faya'cho. Majan aindeccu'suma ña canjaensi tsendeccu tsu tise'pa biacca antiandeccui'ccu ñanga canjaen'faya'cho. Biacca antiandeccui'ccu canjaen'fasi ña majan antiandeccu'suma canjaensi tsendeccu tsu tisupa antiandeccui'ccu ñanga canjaen'faya'cho. Tsendeccu canjaensi majan'suma ña canjaensi tsendeccu'su tsu poi tsandie fae'cco fae'cco ñanga canjaeña'cho. ¹⁵Tsa'caen canjaemba majan a'li tsa ña pa'ccoma metsse catiya'chove manda'cho'suma an'biansi atte'ta tsu tisema si'ngel'ccu fi'ttiya'cho. Toya'caen tise dushundeccu pa'cco tise an'bian'choma'qqe tsu tsa'caen oque catiya'cho. Ñoa'me tsu tsaja Na'su Chiga aindeccui'ccu injancco'fa'choma chi'gapa israendeccuma ansangiamba da'ño.

Acánma fi'tti'cho

¹⁶Ccaqui a'ta Josué mandasi poiyl'cco israendeccu tise'pa aindeccui'ccu canjaeñe bosí Na'su Chigaja Judá aindeccuma canjaen. ¹⁷Tsonsi poiyl'cco Judá'su biacca antiandeccu bo'fa'cho canjaen'fasi Na'su Chigaja zarandeccuma canjaen. Poiyl'cco Zara'su antiandeccu canjaen'fasi Na'su Chigaja zabdindeccuma canjaen. ¹⁸Zabdindeccu fae'cco fae'cco canjaen'fasi Na'su Chigaja Acán, tsa Carmi dutssi'yema canjaen. Nane Carmi tsu Zabdi dutssi'ye. Zabdi tsu Zara dutssi'ye. Poiyl'cco tsu Judá omba'su dutssiyendeccu.

¹⁹Tsonsi Josuéja Acánma su:

—Ña in'jan'cho, Na'su Chiga, israendeccumbe Chigama ñotsse afaja. Tisema avujatsse afaja, pa'cco que tson'choma a'tiembeyi ñanga condapa.

²⁰Tsonsi Acánjan su:

—Ju, tansintse su'cho tsu. Ñoa'me gi Na'su israe'su Chiganga egae tsincon. Qquen tsu ña tson'cho: ²¹Jericó canquenga ca'nimba osha'choma attepa gi ñotssia Babilonia'su ondiccu'jema atte. Toya'caen gi atte doscientove bare'cho corifin'dima, fae kilove tsaiña'cho corima ñña'choma'qqe. Tsama attepa gi tsave in'jamba isupa ña carpani a'tupa an'bian. Nane carpa tsosiccufa'su ande changoni tsu ccui'fa, corifin'dija tsosiccufani.

²²Tsa'caen condasesi Josué mandasi ttattasundeccu Acán carpani buttopa japa atte'fa. Nane tise suqquia'caen tseni a'tu, corifin'dimajan tsosiccufanga. ²³Attepa somboemba Josuéni ipa canjaen'fa poi israendecunga. Nane Na'su Chiganga a'tatsse canjaen'fa. ²⁴Tsonsi Acánma anga'fa Acor sinjuncuni. Toya'caen corifin'di, Babilonia'su ondiccu'je, corima ñña'cho tise dutssiyendeccu, tise onquengendeccu, tise vaura, boro toya'caen oveja sheque'choma'qqe, nane pa'cco tise an'bian'choma tseni Acor sinjuncuni anga'fa.

²⁵Tseni nepipa tsu Josuéja Acánma su:

—Queja ingima da'ño. Tsa'cansi tsu Na'su Chigaja ja'ño a'ta quema'qqe da'ñoña.

Tsa'caen susi poi israendeccu patuma isupa ttova'ccoen fi'tti'fa Acánma. Nane pa'cco tise'bema'qqe tsa'caen patui'ccu fi'ttipa pa'ccoma si'ngei'ccu oque cati'fa. ²⁶Acán'ñe ombanga tsu tsain'bio patuve boña'fa. Toya ja'ñopán tsu boña'cho ccui. Tsa'caen tson'fasi Na'su Chigaja tise israendecuma iyicca'ye'choma ñoqui. Tsa'camba tsu tsa sinjuncuja toya Acor sinjuncu qquen inisecho (ansange'cho qqe suye).

Hai canquema patsu'cho

8 ¹Tsonsi Na'su Chigaja Josuénga su: “Dyombe canjan ni ñoquimbijama. Poiyi'cco que sundarondeccuma angapa Hai canque'su aindeccui'ccu iyicco'faja. Nane tayo gi Hai canque'su na'suma patsupa quenga afe; toya'caen tise aindeccu, tise canque, tise andema'qqe. ²Que'i Jericó canque, toya'caen tsambe na'suma tsonquia'caen tsu Hai canque, tsambe na'suma'qqe tson'faya'cho. Tsa'ma Haima patsu'ta qui osha'cho tsani jincho'choma toya'caen osha'cho aiña'choma'qqe tisumbe angaye osha'fa. Canquembe ccavofanga a'tupa ronda'ya'chove ññoajan.”

³Tsa'caen mandasi Josuéja poi israe'su sundarondeccui'ccu Hai canquuei'ccu iyiccoye ja'fa. Trienta mil bove ñotssia sundarondeccuma attufaemba cose moe'jemba ⁴qqen manda: “Que'ija canquembe ccavofae japa pporotsse a'tupa ronda'je'faja. Nane ñotsse tisupa iyiccoya'chove in'jamba ronda'je'faja. ⁵Ña, toya'caen poiyi'cco ñai'ccu jacansundeccu gi canquenga cats'e'faya. Ingi tsa'caen catsesi Hai canque'su ingi'ccu iyiccoye sombo'fa'ninda gi tayoe ingi dyopa ccuyaquia'caen butto'faya. ⁶Nane tsa'caen gi tson'faya cuintsu ingi tise'pama dyopa ja qqen in'jamba tsendeccu ingima mandiamba canquembe

joccani ja'faye. Ingima tsa'caen mandiamba ja'fasi 7 que'ija tisu a'tupa ronda'je'ttie jangipa canquenga ca'ni'faya'cho. Nane Na'su que Chiga tsu que'inga afeya. 8 Tsa'caen ca'nimba patsupa si'ngei'ccu canquema oque'faja. Tsa'caen tsu Na'suja manda. Ña mandaquia'caen tson'faja.”

9 Tsa'caen Josué mandapa moesi japa Betel canqqe toya'caen Hai canquembe enttingeni a'tupa ronda'je'fa. Nane tsefata tsu Hai canquema chiga amppifani. Tsa'ma Josuéja tsequi cose toe tisupa can'jeni ana. 10 Ccaqui a'tasi Josuéja toya'caen israe'su coenzandeccu'qqe poiyl'cco tise'pa sundarondecuma ttu'se boñamba ñotsse cambia Hai canquenga catseye anga. 11 Tsa'caen tansintsse japa canquenga nepijipa tsa canqqe nortefanga japa tisupa anaña'chove ñoña'fa. Nane tse'tti'ta tsu tise'pa toya'caen canquembe enttingeni sinjuncuja jin. 12 Tsomba Josuéja cinco mil sundarove a'tu Betel canqqe toya'caen Hai canquembe enttingenga tsa Hai canquema chiga amppi'jefanga. 13 Tsa'caen tsonsi tsu sundarondecuja dos naccuve attufa'fa. Fae naccuja canquema chiga amppi'jefani a'tupa can'jen'fa. Toya'caen faesu naccuja Josuéi'ccu can'jen'fa canqqe sombo'tti isevetsse. Tsa'caen can'jemba tsequi cose Josuéja sinjuncumbe enttingeni ja tise aindecu'ccu.

14 Ccaqui a'tasi Hai canqqe'su na'suja tsenima cambia atte Jordán sinjuncuni. Tsa'caen atepa cunshoa'me poiyl'cco tisu canqqe'su sundarondecu'ccu 15 Josuéma cachuiccopa iyiccoye sombo tsa sinjuncuni. Tsa'ma tiseja atesumbi canquembe ccavofani Israel sundarondecu a'tupa ronda'je'choma. Tsonsi Josué poiyl'cco tise'ccu canjensundeccu'qqe tise'pama dyoquia'caen Haine buttopa a'i menia ja'je'cho tsaiqui'ye ja'fa. 16 Tsa'caen ja'fasi poiyl'cco Hai canqqe'su sundarondecuma mandasi tisupa canqqe'ye sombopa Josuéma mandiamba biani ja'fa. Tsa'caen omboemba tise'pa canquema cati'fa. 17 Nane ni fae tsandieyi'qqe can'jembi Hai canqqe ni Betel canqueni. Tsa'caen poiyl'cco israendecuma mandiamba ja'fasi majan canquene se'pipa iyiccoyal'chove me'i'on. 18 Tsonsi Na'suja Josuéma su: “Que oma'ccoma yasaja Hai canqueningae. Nane que tivenga gi tsa canquema afeya.”

Tsa'caen susi Josuéja tise oma'ccoma yasá Hai canqueningae. 19 Tsa'caen tsonsi a'tupa rondasundecuja ccushoa'me jangipa buttopa canquenga ca'ni'fa. Ca'nimba patsupa tse'faei'ccuyi si'ngei'ccu oque'fa. 20 Tsa'caen tson'fasi Hai canqqe'su sundarondecu toenima piyicamba canqqe'ye juru'je'cho onfen'ba sefacconi jangi'choma atte'fa. Attepa tise'pa mani jaya'chove me'i'on. Tseni a'i menianga buttopa ja'cho israendecuja toequi jipa mandiansundecuma ccane'qqe mandian'fa. 21 Josué toya'caen poiyl'cco tise'ccu ja'su israendeccu canqqe'su onfen'ba jangi'choma atte'fa. Tsama attepa tayo a'tupa can'jendeccu Hai canquema patsu'fa qqen in'jamba tsa'caen toequi jipa Hai'su sundarondecu'ccu iyicco'fa. 22 Toya'caen a'tupa canquema patsusundeccu'qqe canquene sombopa jipa tise'pai'ccu iyicco'fa. Israendecuja tsa'caen poine jipa enttingenga Hai

canquesundeccuma ttupa poiya'cco a'ima metsse fittitti'fa. ²³Tsa'ma Hai canqque'su na'sumajan canseveyi indipa Josuéni i'fa.

²⁴Israendeccuja tsa'caen tise'pama sinjunccu tsa a'i menia mandiamba ji'cho Hai canquesundeccuma metsse matichi'ccu fitti'tti nanimba, toequi Hai canqqueni japa majan toya tseni canjensundeccuma fittitti'fa. ²⁵Tsequi a'ta tsu doce mil a'i pa'fa. Nane poiya'cco Hai canqque'su tsandie, pushesu'qqe pa'fa. ²⁶Nane Josuéja tise oma'ccoma yasapa poiya'cco Hai canqque'su aindecuma fitti'tti'faya'ngae anttembe'yi yasácho. ²⁷Tsa'ma Na'su Chiga Josuéma manda anttequia'caen tsu israendeccuja pa'cco aiña'cho toya'caen osha'cho tsa canqqueni jincho bare'choma anga'fa tisupambe. ²⁸Josué Hai canquema oque cati'choja cusepaveyi tsu da. Nane ja'ño a'tapan tsu tsa'caen jincho. ²⁹Josuéja Hai canqque'su na'suma cose'tsse quini'cconga tandan dusiamba fi'tti. Sime tayo chiga amppisi manda cuintsu tsa ai'voma andiamba canqque'su sombo'tti jin'ttinga ttova cati'faye, toya'caen tise ombanga cuintsu tsain'bitssi patuve boña'faye. Tsa'qqe tsu ja'ño a'tapan toya jincho.

Injancco'fa'choma ccase afa'facho

³⁰Tsonsi Ebal ccotta'cconi Josuéja Na'su Israel Chiganga oque oraen'jeña'chove ñoña. ³¹Nane Moisés tsa Na'su Chigama shondo'su israendecunga mandaquia'caen tsama ñoña. Moisés manda'cho tevaen'jen tsu su: tivei'ccu ñoñambi'choa patuma tsu boñamba ñoñaña'cho. Tsanga tsu israendeccuja oque oraemba Na'su Chiganga afe'fa. Toya'caen tsu afe'fa Na'su Chigai'ccu tisupa ñoquiccuya'chove'qqe. ³²Tse'tti poi israendeccu caña'jen'ni tsu Josuéja Moisés manda'choma faesu patu ccutsian'chonga Moisés tayoe tevaenquia'caen ccase tevaen. ³³Poiya'cco aindecu, nane Israel omba'su dushundeccu, ccane jipa tise'pai'ccu can'jen'chondeccu, poiya'cco coenzandeccu, nasundeccu toya'caen ñoquiansundeccu'qqe tse'tti Na'su Chiga a'i'ccu injancco'fa'cho cafonma poifani ccutsu'fa. Cafonma opipa anga'su Chigama afa'su levítandeccumbe isevetsse tsu tsa'caen ccutsu'fa. Enttinge a'ija Gerizim ccotta'cco jin'tti ccutsu'fa. Faesu enttingeja Ebal ccotta'cco jin'tti ccutsu'fa. Nane Na'su Chigama shondo'su Moisés tayoe mandaquia'caen tsu tsa'caen ccutsu'fa Josué su'choma ñotsse paña'faye.

³⁴Tsonsi Josuéja pa'cco Chiga manda'choma afa —ñotsse tsomba avujaya'cho toya'caen egae tsomba vanaña'choma —Chiga manda'cho suquia'caen. ³⁵Nane pa'cco Moisés mandapa tevaen'choma tsu Josuéja cambia afa poiya'cco israendeccu bo'fa'chonga. Nane pushesundeccu, dushundeccu toya'caen israendeccu'ccu fae'ngae canjen'su faesu ande'su aindecu'qqe tsama paña'fa.

Gabaonitandeccu afopoen'cho

9 ¹⁻²Jordánma chiga amppi'jefa'su nasundeccu tsa tson'choma pañamba bo'fa israendeccu'ccu iyiccoye. Nane majan ccotta'cconi canjensundeccu, sinjunccuni canjensundeccu toya'caen rande mar otafari canjensundeccu

Líbano andepie, tsu Josuéi'ccu iyiccoye bopa condasecco'fa. Nane tsa hitita'su, amorreo'su, cananeo'su, ferezeo'su, heveo'su toya'caen jebuseo'su nasundeccu tsu tsa'caen bo'fa. ³Tsa'ma Gabaón canque'su heveondeccuja Josué Jericóma toya'caen Haima patsu'choma pañamba ⁴asi'ttaemba afopoeñe ashaen'fa. Nane tssoru saquiyo toya'caen vinoma angaqqe'su ttono botiyama pi'pi'choma'qqe otsian'fa tise'pa boronga. ⁵Tssoru sapatoma pi'pi'choma ejiamba tssoru ondicu'jema ondicu'fa. Tise'pa angaya'cho panjan ñoa'me sambapa tayo munsan'cho. ⁶Tsa'caen ñoñamba Gilgalni ji'fa Josuéi'ccu condaseye. Jipa tsu Josué toya'caen israendeccunga'qqe qqen su'fa:

—Biani'su ande'ye gi ji'fa que'i'ccu fae'ngae injanccoye.

⁷Tsa'ma israendeccuja tsa heveondeccunga su'fa:

—Isha que'ija ingi'ccu pporotsse canjensundeccumajan ¿ma'caen gi que'i'ccu fae'ngae injancco'faya?

⁸Tsa'ma tsendeccuja Josuénga su'fa:

—Que'ima shondosundeccuve ingima ca'niajan.

Tsa'ma Josuéja tise'pama ñajampaña:

—¿Ma'candequía qui? ¿Mani tsu que'i ande?

⁹Tsonsi tsu su'fa:

—Que'ima shondosundeccuja ñoa'me biani'su andeni can'jemba Na'su que'i Chigama pañamba gi ji'fa. Nane Na'su Chiga Egiptosundeccuma tson'choma pañamba ¹⁰toya'caen tsa Jordán na'ema chiga sombo'jefa'su dos amorreo'su nasundeccuma patsu'choma'qqe gi paña'fa. Hesbón canque'su na'su, Sehón, toya'caen Basán ande'su na'su, Og, tsa Astarot canqueni canjen'suma'qqe patsu'fa qqen gi biane paña'fa. ¹¹Tsa'caen pañamba tsu ingi coenzandecu, toya'caen poiyo'cco ingi andeni canjensundeccu'qqe ingima qqen su'fa: 'Anque'suve ñoñamba japa israendeccuma cachuiccopa qqen su'faja: Ingija que'ima shondosundeccu gi. Tsa'cansi chigáne ingi'ccu fae'ngae injancco'faja.'

¹²Ñoñamba que'ini jiye sombosi va ingi panjan toya ju'rutssi tsu. Tsa'ma ja'ño que'ini ne'pitsse tsu sambapa tayo munsan. ¹³Toya'caen cuna ttono botiyama gi isupa vinoma fiñamba sombopa ji'fa. Tsa'ma ja'ño sambapa tayo doji. Ingi sapato, ingi ondicu'je'qqe tayo tssoruve da'fa biani ji'fasi.

¹⁴Tsa'caen su'fasi Israel aindeccuja injanga tsendeccu i'cho osha'choma pporaen'fa. Tsa'ma Na'su Chigama ñajampaña'fambi. ¹⁵Tsonsi Josuéja fae'ngae injancco'faya'chove afa tsa aindeccu cuintu opatsse canse'faye. Toya'caen tsa bo'fa'cho coenzandecu'qqe “Ju” qqen ñoa'me su'chove su'fa.

¹⁶Tsa'caen gabaondeccui'ccu injancco'fa'cho tres a'ta pasasi israendeccuja paña'fa tsendeccu tise'pai'ccu pporotsse can'jen'chove.

¹⁷Pañamba jaye ashaemba tres a'ta japa nepi'fa tise'pa canqueni: Gabaón, Cafira, Beerot toya'caen Quiriat-jearimni. ¹⁸Tsa'ma tsa'caen tseni nepi'ma tise'pai'ccu iyicco'fambi, fae'ngae injancco'faya'chove tayo afapa. Nane tayo tsu israendeccu'su bo'fa'cho nasundeccuja Na'su Chiga paña'jen'ni tise'pai'ccu fae'ngae injancco'fa.

Tsa'caen iyicco'fambisi aindeccuja iyicca'yepa egae afa'fa tise'pa nasundeccuma. ¹⁹Tsa'caen afa'fasi tsu su'fa:

—Na'su israe'su Chiga paña'jen'ni tise'pama ñoa'me su'chove afapa gi tise'pama ja'ño fi'ttiye osha'fambi. ²⁰Tsa'ma antteya'cho tsu cuintsu canse'faye, nane ingi tise'pai'ccu fae'ngae injanccoye ñoa'me su'choma chi'gasi Chiga ingima iyicca'yesa'ne.

²¹Toya'caen tsu su'fa:

—Canseye anttepa gi si'tsive accoshasundeccuve, tsa'ccuve ichhoisundeccuve tise'pama manda'faya cuintsu tsai'ccu poi israendeccuma fuite'je'faye.

Nane tsa'caen supa tise'pa ñoa'me su'choma cambian'fambi.

²²Tsonsi Josuéja gabaondeccuma ttu'sepa su:

—Que'ija ingima afopoen'fa: 'Biani canjensundeccu gi' qquen supa. Tsa'caen afopoen'chone qui ja'ñojan ²³qquen vana'jen'faya: Tsangae qui si'tsive accoshasundeccuve toya'caen tsa'ccuve ichhoisundeccuve dapa ingi Chiga can'jen'ttini tsa'caen sema'faya.

²⁴Pañamba Josuénga su'fa:

—Que'ima shondosundeccu gi a'tatsse paña'fa ma'caen Na'su que'i Chiga tisema shondo'su Moisésma manda cuintsu anttembe pa'cco va ande'su aindeccuma fitti'tti sefaemba pa'cco va andema tisumbe isuye. Tsa'caen paña'jemba gi paye dyojopa tsa'caen afopoen'fa tisupama ccushaëne. ²⁵Que'ija ingima tayo patsu'fa. Que'i ma'caen tsonsi ñotssiya'chove in'jan'da tsa'caen ingima tson'faja.

²⁶Tsa'caen tsu Josuéja tsendeccuma ccushaen israendeccu tise'pama fittittisa'ne. Nane fi'ttimbe'yi ²⁷tsequi a'ta gabaondeccuma si'tsive accoshasundeccuve toya'caen tsa'ccuve ichhoisundeccuve tson cuintsu poi israendeccunga toya'caen Na'su Chiganga afeye oque'je'ttinga'qqe tsa'caen sema'ne. Ja'ño a'tapan tsu tsa'caen semamba canse'fa.

11 ²³Tsa'caen tsu Josuéja Na'su Chiga Moisésnga condaquica'caen pa'cco tsa andema patsu. Patsupa tsu poi israe'su aindeccunga andema attufaen cuintsu an'biamba can'jen'faye. Tsa'caen tsonsi tsu poi'lico a'i tsa andeni ñotsse opatsse canse'fa.

Josué aindeccunga condase'cho

23 ¹Na'su Chiga fuitesi israendeccu poi'lico tise'pa iyiccosundeccuma patsupa bo'tssingae opatsse can'jensi Josuéja coenza ccashe'yeye da. ²Tsa'caen dapa manda cuintsu poi israendeccu, tise'pa coenzandeccu, nasundeccu, ñoquiansundeccu, mandasundeccuma'qqe ttu'sepa boña'faye. Bo'fasi tsu qquen su:

“Ja'ño gi coenza ccashe'yeye dapa quimbi. ³Que'ija atte'fa pa'cco Na'su Chiga ma'caen que'i'ccu iyiccosundeccunga tson'choma. Nane ñoa'me tsu tiseja que'ima in'jamba que'ine iyicco'su. ⁴Andema attufae'ne gana qquen tsomba gi attufaen poi aindeccu tisunaccu tisunaccu isu'faye. Tsa'ma jo'su

tayo patsuye'cho andeveyi attufaembipa toya patsuyembi'choama'qqe gi attufaen. Nane chiga sombo'jefa'su Jordán na'eñe chiga amppi'jefa'su rande mar Mediterráneoipi attufaëne gi manda. ⁵Nane Na'su, que'i Chiga, ñoa'me su'choi'ccu tise que'inga tayoe condaquua'caen tsa andeni can'jen'cho aindeccuma joquittsiansi qui que'ija tsa andema isu'faya.

⁶“Dyombi'tsse ccutsupa anttembe'yi pa'cco va Moisés manda'choma nanitssse tson'faja. Ni fae su'choveyi'qqe aqqe'pa'fajama. ⁷Quei'ccu toya can'jen'cho va ande'su israembindequuai'ccu fae'ngae tson'fajama. Tise'pa chigandecuma pañamba iñajan'fajama. Nane tsesu chigandeccu iniseja afa'ma'sia tsu. Tsai'ccu que'i su'choja tansintsse su'cho qqen afa'fajama. ⁸Nane que'i ja'ñopan tsonquua'caen anttembe'yi Na'su que'i Chigama in'jan'faja. ⁹Que'i iyicco'je'fasi Na'su Chigaja rande canqqe'su quinssetssia aindeccuma a'tatsse tayo patsu. Nane ja'ño a'ta majan aindeccuyi'qqe que'ima se'piye osha'fambi. ¹⁰Na'su Chiga iyiccopa tise ñoa'me su'choi'ccu que'inga tayo condaquua'caen que'ima fuitesi fae'ccoyi que'i'suja mil a'ima dyoña mañañe oshaya. ¹¹Tise tsa'caen tsonsi, injan'jeñi tisu injama'choma ñotsse ñoñamba Na'su que'i Chigama ñotsse in'jan'faja. ¹²⁻¹³Nane in'jan gi que'i va su'choma in'jan'faye: Chigama catipa va quei'ccu toya can'jen'cho aindeccui'ccu fae'ngae tsomba, tise'pa'su pushesundecuma pushe'fa'ninda tsu Na'su, que'i Chigaja, tsendecuma manda mañaña'bi. Tsa'ma tsendecui'ccu tsu que'ima vanae'jeña. Nane va'cho'vai'ccu avuma indiquua'caen, quendecco'choi'ccu aña'choma indiquua'caen, tsu tsendequi'ccu que'ima qqueñaña. Mappi'je'choi'ccu ma'ppiquua'caen que'ima noñangiamba toya'caen nojan tso'fema iñaccaenquia'caen que'ima dañoña cuintsu tsequi a'ta ni fae a'i que'i'suja va Na'su que'i Chiga que'inga afe'cho ñotssia andeni can'jembe cañe.

¹⁴“Ña, Josué gi ja'ño paye tson'jen. Tsa'ma toyi'te gi in'jan cuintsu que'i in'jan'faye pa'cco injama'choi'ccu toya'caen pa'cco canse'pai'ccu ma'caen Na'su Chiga pa'cco tise ñoa'me su'choi'ccu ñotsse tsoñe su'choma tayo tson'chove. Ni fae'ccoveyi'qqe tsu shacambi. ¹⁵⁻¹⁶Tsa'ma ñotsse in'jan'faja: Na'suja que'ima ñotsse tsonquua'caen que'ima ñoa'me egae tsoñe osha. Nane que'i Na'sui'ccu injancco'fa'choma pañambipa ñotsse tsombi'ninda tise tayoe ñoa'me su'choi'ccu egae tsoña'chove su'choi'ccu tsu tsoña. Que'i tsa'caen tise ma pañambipa faesu chigandecuma'qqe ccarupa iñajan'ninda tsu Na'suja que'ima iyicca'yeya. Iyicca'yepa osha'choi'ccu que'ima vanae'jemba ñoa'me que'ima sefaña cuintsu ni fae'cco que'iyi va tise afe'cho ñotssia andeni can'jembe cañe. Nane ñoa'me metsse qui sefa'faya.”